



ASTURIÉS NEL DEBATE DE LES SELECCIONES DEPORTIVES

Carlos Suari Rodrigue

El deporte d'alta competición constitúi un fechu social con capacidá d'axuntar a lo específicu del xuegu una carga de representación identitaria qu'abarca sociedaes enteres nes que los sos individuos de manera sentimental reflexen lo que son cultural y colectivamente, retratando como con papel carbón el sentir del so pueblu y dándonos una idea mui aproximada del so nivel d'autoconceptu, les sos querencies o les sos reivindicaciones. Por simplificar la esplicación, los aficionaos a les diferentes modalidaes deportives funcionen como si d'una muestra estadística se tratare dientro del conxuntu poblacional total. Si bien esto ye relativamente constatable a pequeña escala colos equipos que compiten nes lligues locales y de menor nivel, decatámonos de qu'esti fenómenu faise más representativu cuando falamos de combinaos o selecciones de calter absoluto, ello ye, aquellos que representen a la unidá máxima territorial y alministrativa que se-y asigna a una comunidá de persones.

Consecuencia d'ello ye que se produza n' España un fenómenu anómalu como se conocen pocos en mundu, faciendo que por exemplu Asturias tea representada no deportivo poles selecciones deportives absolutes españoles magar que sía, el nuesu, un país con identidá absolutamente definida, y non sólo eso, dotáu d'un sistema deportivu y competitivu desenvueltu y capacítáu pa representar en tolos aspectos y n'esclusiva a la población asturiano. Lóxicamente, esti fenómenu repítase nos demás países qu'integren anguaño la realidá estatal. La esplicación a esti fechu concretase en que'l control cultural y ideolóxicu recái nel propiu estáu, nos sos medios de comunicación y nos órganos encargaos, nesti casu, de lo deportivo, que dende la centralidá, dicen tentar de representar, ensin suerte, la diversidá plurinacional del estáu.



El fortalecimientu de les opciones nacionalistes perifériques ta viniendo a abrir un debate que va namás unos pocos d'años yera un tema tabú: la puesta en dulda de l'autoridá representativa de les selecciones deportives absolutes españoles frente a les autonómiques o nacionales. Mentos, al nacionalismu central o

españolista sálten-y tolos resortes y diseña a marches forzaes nueves estratexes pa caltener unes competencies que más tarde o más temprano



van tener qu'entregar obligaos a dexar de cultivar la hispanidá a costa de les grandes competiciones deportives internacionales, tal y como faen anguaño en vista de que, precisamente, esi calter español desínflase en toles capes sociales y puntos del estáu como se desinflen los globos nes salíes de los estadios cada domingu.

El meyor exemplu d'esti remanamientu interesáu del deporte dase na Selección Española de Fútbol absoluta como máximu proyectu d'estáu, y que per otru llau ye'l fracasu más estrepitosu y reeditáu de cuantos se conocen a escala internacional. La instrumentalización d'esti combináu llegó nes últimes temporaes a puntos insospechaos, asina por exemplu, entámense grandes recibimientos en polideportivos y salones d'actos onde neños y pas saluden a los sos "ídolos" previu agasayu de material deportivo "rojigualda", que dicho sía de paso, sufraguen aragoneses, catalanes, vascos... que sufrago yo como asturianu únicamente asturianu pa qu'España se promocione, por decir, ente los más pequeños de Xixón llevando el cínicu argumentu de fondu de que "el deporte educa, el deporte previén, el deporte esteriliza, el deporte esto, el deporte lo otro...", miren señores, nun nos tomen más el pelo, el deporte-espectáculu ye simplemente eso, tan beneficioso o dañible como cualquier circu de mases y vustedes tán remanándolo con otros fines. Y too pa, mentira con mentira, tentar de reforzar una torga que nun puede aguantar más.

Mentanto, Asturias impasible y muda nel debate reivindicativu nel qu'otros países yá defenden postures valientes, ambiciosos y fites. Cierto ye que nun estraña esta situación si analizamos paralelamente l'estáu de coma profundu del asturianismu políticu o'l desinterés qu'esti tema provoca nun asturianismu cultural bien de vegaes enchipáu y fatu, que s'aisla indiferente como si'l país tuviere pa desuniones ente reivindicación integral y manifestación artística, gran problema ésti cuando hai una subvención per medio. Ingredientes perfectos pa mesturar con una Federación de gaita y pandereta nun Principáu que desmoralizaba al Alcoyano. Resultáu insuperable: Asturias escaecida, hasta en el fútbol.

Necesario y urxente ye revisar el modelu de selecciones deportives nacionales y dar a les que lo demanden plena autonomía pa que les sos participaciones internacionales pasen a ser d'oficiosos a oficiales, tan oficiales y reconocíos como han de ser les sos identidaes, la nuesa identidá asturiana. ¿Modelos aplicables y nada escabarríos anguaño? Por nun dir acullá, el británicu, o quiciabes una llibre adhesión o independendencia de cada país a los combinaos estatales. El camín ta abiertu, ¿acompañenme?